


滄趣樓詩集

詞附



Digitized by the Internet Archive
in 2010 with funding from
York University Libraries

滄趣樓詩集卷六

閩縣 陳寶琛

海天閣成屬有北行留別山中諸子

乙酉

東坡六十一始規白鶴峯明春乃落成我齡適與同屏
居越兩紀一壑甘長終誰知無心雲去住隨天風茲山
匪廣峻橫舍環玲瓏脈絡係全閩却居閭井中引泉溉
新竹對月哦古松固慮佚老辦不爲山靈容欲別謝知
愛所期信無窮行藏吾自審不用哀龍鍾

入都拜別 先冢

孤兒昔作宦十載一過家 大父猶老健 二人鬢始
華五年失吾祖 母兮亦棄兒 父幸見得歸汝才

詎適時長跼聆 爺言誓侍 爺以老冉冉一星終欲
報恨不早遺羹既無所椎牛亦誰知賸持年年淚來灑
青松枝此行豈見心除經已周紀壯盛付等閒衰遲復
何恃得歸兒會歸不爲 祖 考忝成虧蓋天事晚節
敢自貶下山且十里猶聞歎息聲雨止慎泥潦微陽儻
向晴

旭莊以圭庵留別詩襍成長卷詩孫畫其後丈許去秋
屬題約桃花開時來會適余北行感賦一章卽以志
別

何郎書畫王郎酒遲暮相憐興不衰自昔憂天甯過計
祇今思舊忍重披宣南老我巢痕覓海上如君楔飲期

留墨他年更成憶改元宣統暮春時

三月初九日

召見

養心殿

負辰延英色自溫臣心如結不能言

兩宮殯在餘

恩淚九陌車過見燹痕袞袞故知時局異張維誰信古

經尊散材廢學由來舊縣蕝何堪作叔孫

畏廬愛蒼招集江亭

萬葦搖春了不殊西山如笑向髭鬚得乘佳日循城堞

誰料殘年見

闕觚飲啖儘容吾輩健行藏未悔半生

迂盲僧能說同光盛歌者何戡恐亦無

次韻答實甫見贈卽送備兵欽廉

相逢容易鬢成斑海嶠孤臣亦賜環一去眞同華表鶴

卅年重見太行山
還君使節蠻夷長老我生涯
木雁間
擅壑專邱猶未饗
可堪塵土浣衰顏

湖樓酒坐呈孝達相國

不期垂白共深尊
照眼湖光近
禁垣四海喜聞公老

健卅年獨幹世貞元
彈冠一出慚微尙
載筆相從愴舊

恩
天性愛蓮漸長夏
得陪高閣及時論

題章价人直州

壽麟

銅官感舊圖
曾文正靖港之敗自

沈以殉章掖出之

天人交勝一於定
成敗何常死生命
湘鄉宏毅聖者徒
勛業所存要非性
入屯出險恃原往
得喪區區總退聽
當時設竟從彭咸
知命豈非順受正
多君手援在天下

假以護持儻天令拯危惻怛甯前知重爲中興生李晟
山川再過戰聲在箕尾已歸哀感迸舍生自是儒門眞
忍濟留資兵事鏡左左襄記王王秋詩各有激目擊諸艱足
旁證津津施報婦兒言莫滓太清心未淨
訪舊七首

慈仁寺松

慈仁寺燔行十稔突見丹碧成崇祠虬松兩三猶舊姿
自我不見常汝危身厯浩劫兀不知却對霜髯憐吾衰
吾衰乃有看汝時昔日同遊存者誰張叟先來聞有詩
可能雪中持一瓠亭林龕前斟酌之仰讀乾隆御筆

碑

法源寺枯

憫忠寺古繁獨完春閨及來看牡丹紛紛黃紫類新植
所愛雙枯根深槃舊圍注視似稍長疎蔭交翠禪庭寬
爾時撫柯輒搔抑霜膚郁烈逾椒蘭柏身松葉足本性
已外榮落何炎寒花時易過更相就對此永日容忘餐

崇效寺楸

朴公圖卷失不收再來獨見前朝楸著花老榦未覺醜
根節磳砢陰繁稠當時樹下展圖讀泚筆賡續王朱遊
虞山帝傅常獨至自寫伊鬱酬清幽天迴地轉詎所料
痛定思痛當誰尤僧貧換米及故紙此樹能免終薪樵
巡廊坐階默相向急雨打葉風颼颼

龍樹寺槐

城南老槐多閱人未料世事日日新精廬幸免兵火燼
其奈時尙憎陳因佛移僧逐換青堊榜書楹句摧爲薪
昨聞代者又殊好趣撤墻屋重經綸我來避囂值喧闐
匝地瓦礫天灰塵落成突兀定何計不惜一擲千萬緡
爲槐裝點失槐養何愛爭此荒寒濱半聾詩人昔居此
樓外方沼饒游鱗魂歸繞槐或三嘆古意滅沒從誰陳
極樂寺海棠

國花堂下花如錦展禩年年就花飲不知花萎自何年
別夢繞花垂卅稔數叢無乃孫子輩穉幹柔條詎尤品
乾嘉以來盛觴詠忍使流風到今寢或云輦致貴家園

朱郎潭潭誰與諗勝題未改堂廡盡萬事黃梁同一枕

鄭虔

仲濂丈

若在定詞成立對斜陽作寒噤

南北河泊荷花

卅年蓄淚來觀荷南泊漸淤花不多單車犯雨就北泊
但見葭莢風揆搓柳翁圭翁攜手處破船偃岸虛清渦
吾曹冠佩死未悔花又何罪天薦瘡遊塵填漲十剎海
誰念郊野遺姝娥旱摧潦敗及今盡不樹胡刈甯由他
張王醉魄不可起詩記默誦重滂沱欲行不忍數回顧
老柳空腹吾蒼僂

天甯寺菊

向日冷官愛冷花秋近城西常駐車住僧養菊待客選

載歸重九猶含葩菜畦豆架紛無數老我重來選花處
禪房客斷僧亦稀塔上數鈴自相語送行舊是長短亭
今歌驪駒不出城買花況貴日本種三貝子園最有名
光林宏業迭生滅隋唐金元去如瞥於花何有寺一塵
佛告塔鈴不可說

寓齋雜述

危時羣患貧僦宅乃競貴到京三月近始得數間庇地
偏便閒放屋老稱朽邁故家道咸遺餘韻但槐檜承平
一俯仰顧我況亦寄軒窗取透涼未爲堦戶計忍凍能
及春庭花可一醉

牆東鋤爲原築榭坐風月貪涼眠復遲病肺例秋發所

欣新種竹足雨竿竿活稚樹與雜花因依各萌達天功
詎可恃灌溉要無闕經月鑿井成畦蔬亦成列身勞兒
女喜隨地恣採掇優游蠲吾疴誰謂役於物

弱冠始昏宦常依甥館居老竊冰清譽亦挈女壻俱衰

壯每相笑不必定異趨王翁述過庭倭曾皆可模

外舅常述

文勤與文端文正聚會之盛

今我奚汝益世論方賤儒殖落卜周亂

承羞匪一夫頽齡復何覲經訓聊自娛秋燈漸可親示
子以故吾

海荷開且闌張叟病未已一樽豈或尼坐見涼風起頗
間休假中詩卷自料理思舊蒐遺文無人會微旨宣南
盛氣類往者逝如水卅載終合并與公俱老矣樓臺故

無地錯擬集賢里但願長賡酬香山竊自比

隘巷車磷磷知是沈十二入門便說詩晷盡炳燭繼坐

月綠淨亭此景猶夢寐因話百步廊却憶信州試

愛蒼爲粵

臬有綠淨亭爲贛藩作百步廊愛蒼嘗訪余南昌同至廣信余游粵亦主愛蒼半生較仕隱一

笑總兒戲離合雖偶然心情逐年異莫辭會面數得暇

正不易淨拂竹間牀少須嚴羽至

幾道新來

老妻西湖歸自詫晚有福憐我塵土中肝膈失山綠誰

知一秋夢長在南溪曲雖無裏湖荷似勝理安竹八月

月又圓無由與看瀑

去歲仲秋挈家泛月南溪止小雄山齋

北來獨訪舊

尙欠僧房宿早晚霜葉紅山山皆路熟紀游成報章兼

訊東籬菊

出門何所詣款段西復西同年存張侯孤僻與我齊豈

無向晨星落落天各涯卅年異出處獨子頻分攜小帆雨宦

閩復臨於杭州此來隱王城山河數朋儕生世孰可樂遑爲泉

下悽勇退夙子羨相看能勿哈秋花自爛漫且醉霜前

杯

沈陰積成雨通夕風怒鳴驀思水上村颶發淫潦并居

人念客子畏寒何所營夙駕就館餐夜爐對書檠由來

秉禮國所恃安無傾小忠效載筆何日觀化成遠愧吾

叔子宛然魯兩生先廬抱經卧不聞風雨聲

潘蓮巢焦山畫軸爲袁珏生翰林勵準題

江南江北數名山惟有焦先是昔顏畫亦幸存留此勘

乾嘉風物在人間

題冒鶴亭農部

廣生

盤山游草

文采繩繩水繪園江湖斷句匹蘭蓀偶來飛鞚凌盤谷
便欲題詩滿薊門道喪風騷愁歆絕官閒邱壑與溫存
定光塔際凭欄客卅載重提舊夢痕

九日節庵招集廣化寺同陳仁先

曾壽

潘吾剛

清蔭

伍

叔葆

銓萃

江霞君

孔殷

感和節庵并懷伯嚴江南

一尊輦下又重陽世事經年足斷腸晚歲幾回容會合

橫流何處問行藏名藍思舊生天闊

張文襄
常來此

叢菊娛人

滿座香鍾阜持螯應見憶別來詩鬢恐添霜

送張文襄公歸櫬

風吹塵沙如黑煙城郭慘澹飛紙錢彌天心事一棺了
丹旄此去無日還爲臣獨難古所慨謝安裴度甯非賢
移山逐日老不給矧更百慮鑱其天漫漫修夜大星失
覘者於國猶哀憐寸丹灰盡料未死儻籲 宗祖通靈
乾太行蠅蠅送公處卅載豈意重隨肩對談往往但微
歎此景追味滋涕漣九原何者算無負躑躅四顧傷殘
年

謁假過家入小雄山留題聽水第二齋

山人捉入官山水躍過屋崩巖破雲下壓倒數行竹溪
沙或改道岸蹊歛成谷獨有千仞崖長懸三疊瀑坐我
石牀安飲我茶竈熟感彼懷久要媿茲戀微祿得歸復

捨去既至不遑宿請留息壤盟勿爲山靈辱

除夕至金陵伯巖有詩見及因答其意

庚戌

一年兩會近成例今我來思乃騎歲除夕傾談漏且闌
元旦君先以詩至閉門歌哭取自養瓠落無容豈忘世
浣花味諫併一鑑日治萬愁鑄爲字邇來此道失浮競
根本性情害政事訓詞深厚古有聞未屑雷同況羹沸
日輝風暢鳥雀喜想望中興驗春氣著龜自取庶民從
韜鐸何關處士議老雞不晨百無用啄粟太倉類遊戲
秋風事事可硬差譚執還當就吾契

次韻答樊山布政元日瞻園吟集見贈

江山龍虎接茵席主客林塘樂晨夕風帆吹落舊年春

湯社趣開新歷日我如漚鳥近寢馴使君故亦儻蕩人
蓬萊一謫卅載逝坐見滄海三揚塵陝以東西江左右
潁洞年時阻攜手築樓我卧閩山雲入幙君醺燕市酒
淒涼世事頓陵谷蹭蹬才名例箕斗相逢一笑俱華顛
若者雞口若牛後出山小草不識時往來柳雪飈輪馳
山邱華屋空思舊風景新亭且說詩到頭失得誰爲福
亘古輸贏無此局風流人尙懷謝安工速君兼擅枚叔
發春獻歲試义手嚼微含宮出挂腹功名浮白總等閒
著述殺青元自足名園廣讌爲我開感話舊雨睎金臺
酒壚吟魂招不來沃醑誰與生前杯題襟人海行復別
攬轡神州正費才賡酬四坐雄蘇梅壇站翁眞嬰鑠哉

送江杏村歸養

少戇還君著作庭天將雨露寓雷霆遂初此去臣何嫌
亂政從來國有刑書壁會當思魯直裂麻竟不相延齡
咳餘未乏酬 恩地勤與鄉鄰講孝經

顧鶴逸畫山水卷子爲曹君直舍人題

卧游長在水雲閒流水無聲雲亦閒自是軟紅緣未盡
南中隨地有溪山

四月二十夜試院賦呈李蔭墀唐春卿二尙書

一笑重來選佛場冬烘換得滿頭霜橫流無地容芻狗
古道何人惜餽羊舊侶貞元猶作健遺音正始未全亡
他年追憶還疑夢官燭花殘月半廊

文文忠師畫山水小帆同年屬題

聖母賢王造兩朝个臣風烈屹雲霄江河世局非難挽
箕尾忠魂不可招大事能無韓魏國中樞誰復李文饒
白頭弟子披遺墨相對蒼茫淚似潮

六月再與校士之役瑞臣侍郎見和四月闈中作疊韻
奉酬並呈春卿尙書

聯袂論文又一場暑庭雨過月如霜漫持舊式求名馬
重累官厨耗食羊天與朋簪忘老至世傷王迹恐詩亡
明朝君直橫經席講罷薰風滿 殿廊

送楊昀谷

增華

改官入蜀

老恨平生欠蜀游看君攬轡劍門秋一官雞肋無中外

萬卷牛腰任去留城闕浮雲紫別夢江山斜日費邊籌
建瓴自昔雄天府忍遣詩人賦四愁

十刹海酒樓望水南張文襄宅後舊種白蓮

凭欄又過觀蓮節隔著紅蓮見白蓮欲起種蓮人一間
明年花可似今年

題何潤夫雲山別墅春宴圖雲山別墅者三晉朝士浣
園直廬祁文端所題庚寅辛卯間文恪與其鄉人欲
規復之擇地下斜街築屋種樹潤夫實董其役庚子
燬後重構今且十年予既諗廢興之由益感念文恪
爲賦長句

西山對酒如列眉天然一塢花繞之種花成陰人老矣

坐閱塵劫歡滋悲我來突兀詫壯觀此野何減蒹葭移
晉陽耆舊昔經始題榜實取文端遺淀園水木夙在眼
卜築最有斜街宜落成文恪尙一至甯料兵火曾未基
楮扶塗墍又十載花竹語笑還平時君閒好客輒泥飲
客去獨對山支頤白衣蒼狗故見慣陵谷絕倒愚公移
斜陽挂樹怪我至酒徒壚下當招誰相門每過臉必泣
香火矧憶亭林祠壬午出都前陪祭顧
祠文恪與談良久此身安歸且取
醉秋至相戒休爲詩

再疊前韻答瑞臣

竿木何堪溷戲場豐鐘感氣故知霜狂歌亦自憐衰鳳
瞑坐從人笑癡羊得就論文觀正變敢云學易悟存亡

與君世舊交偏晚望作夔龍贊

舜廊

七月十九日同嘿園游翠微廬師諸寺

山靈不愠我來遲急雨迴風與洗悲破刹傷心公主塔

壞墻掩淚偶齋詩後生誰識承平事皓首曾無會合期

三十年前聽琴處祕魔厓下坐移時

曾與偶齋壺公黃齋再同聽吳少嬾

彈琴
於此

龍泉庵坐月示嘿園

洗秋雨止宿松寮月午雲開夢亦消破曉聽泉還蹴起

清光一失是明宵

大悲寺秋海棠

當年亦自惜秋光今日來看信斷腸澗谷一生稀見日

作花偏又值將霜

二十夜雨過對月

夢醒猶疑雨滿山
龍公又放月光還
半規松際吾逾愛
及取東方未白間

重過卧佛碧雲二寺

香山蘭若似年時
零落行宮總益悲
閒說六飛曾一幸
君王終惜露臺貲

自西山歸瑞臣見示三疊之作依韻再和

若箇將身作道場
荃蘭攬涕視天霜
等閒大厦容巢燕
從古多歧易喪羊
孔跖俱塵輪一醉
楚凡同坐定誰亡
夜來洗得心如水
松月風泉滿佛廊

昀谷寫贈西山游草贈此爲報

瞿唐水落歲云秋却爲西山十日留月下聽松滋有會
雨餘觀瀑是何修身閒猶羨爲僧樂境勝元須得伴游
一卷煙霞親授與勝從別後託書郵

七月廿四日復同瑞臣校閱優生試卷四疊場字韻見
示仍用前韻酬之

摸索甯迷古戰場相從三度飲元霜羣空敢謂收眞驥
官濫猶當勝爛羊琴散廣陵疑遂絕笙詩華黍未應亡
秋風百草無窮思贏得微吟共倚廊

重游戒壇潭柘二寺得詩六首示嘿園宰平因寄堇腴
西山吾故友久別渴一訪潭柘稍阻深戒壇致清曠前

游悔草草夢想半已忘有分及餘年登巔騁秋望見從
得二子濟勝聊自壯猶疑在故山松月坐相向此心本
無住所見孰真妄聞梵各灑然無爲憶曩邇

入門眩丹碧千佛閣一新戒壇勝在松貴是遼金陳一
松插霄立蒼黝不見鱗一松稱卧龍抉石根如輪孫枝
亦屈鐵偃蹇不可馴其一雖空心要與枯柏鄰獨憐活
動松怛化逾廿春生邀宸翰賞死作僧厨薪琳宮有
興廢古木煩見珍

騷情滿僧壁賢王詩集唐天教十年間踏徧山山蒼再
出事已非朝露況不常想當抽思初時上高閣望一氣
焉可辨渾河長自黃竭來蔭庭樹愛此召伯棠俗緇侈

檀施偉哉選佛場

恭忠親王罷
政時常居此

曉尋觀音洞乃登極樂峯洞深未窮底峯峻凌空濛峰
後亦一洞謂與渾河通當年避兵人千百來求容眾入
一不見從此丸泥封我讀壁上題盡然聲淚同上述亂
離狀下勘富貴空誰將此時心散作千聲鐘回向馘我
佛冷冷西來風

昔爲岫雲游到寺已昏黑那知山門外雙松翠交織

宸題引入勝雲日與絢色升階見娑羅銀杏尤夙識蹤
尋出寺左石徑頓坦直有亭夾清湍丹堊亦新飾去都
且百里布施定誰力龍子與拜輒奔走客萬億幸先香
會至食宿免見逼人夢習泉喧窺牀惜月旻能留過中

秋朝夕共探陟

山好半在樹樹多能作嵐峯迴磴隨轉深翠藏龍潭潭
小却不凋酌之例且甘孤亭近陽曦就樹藉草談澗石
誰留題遍視得兩三蘇州

可莊

與祭酒

伯熙

前游曾並驂大

夢先我醒笑我還朝簪我心似潭水世味孰足貪卒業
幸放歸聽泉終一庵二子實聞此山靈爲之監詩成急

寄似黃髯洞庭南

董映與前游
今僅存矣

十月二日獅子窩觀紅葉

霜葉如花易失時凋疎猶勝但空枝歸鞍揀作齋頭供
後夜風狂自下帷

雪中過石遺招同堯生酌谷登陶然亭

卅年不見江亭雪老顧犯寒迹前轍城南冷人得雨三
聯句僧窗慰孤子西山入雲怪相避乾葦戴花愁壓折
微陽欲吐陰旋凝薄飲頻消氣不熟巋然劫後竟我待
慚媿髣華照飄瞥此人此景能幾逢影事陳陳更休說
憂時闕道吟立就乞外誠齋行復別却因難弟憶元方
白戰故山久絃絕

壬辰閩中大雪與似玉
疊韻累月石遺兄也

劉少泉大令以胡石查農部畫卷屬題畫後有王文敏
書胡王故潘文勤師客癸酉師主京兆試余與分校
二君又同爲榜中人感賦一絕

舊人牢落海王村說得能銷半晌魂榜紙燭花猶歷歷
馬撾忍過鄭奩門

陶齋招爲東坡生日節庵新至信宿卽歸陶齋有詩索

和

謫仙非謫乃其游坡公故是仙者流谷神出世八百秋
禁網所脫聲畫留陶齋好古蘇齋侔梁髯新來趣命儔
圖書色香逾薦羞陳以饗客饗客求嗟公於世生何讐
死作奎宿讒始休已灰之木不繫舟孰者龜鶴孰蜉蝣
往來人海髯如鷗此會欸若風中漚主人詩好難爲酬
雪大能上西山不

祁文恪詩卷爲何潤夫題

辛亥

年家耆舊繫人腸最有高陽與壽陽頭白還朝喬木盡

蘭叢門館更滄桑

蘭叢書室
文端自題

四朝聞見說來真戀闕憂時重乞身老尙溫經閒鬪韻風流已是道咸人

元辰雪際卷頻披廿載低徊最後詩沈陸自關夷甫輩
味公絕口不言時

何郎相見亦衰翁百首攜持劫燹中長憶別時遺款在

顧祠如掃就松風

壬午祭顧祠後
卽與公訣矣

瑞臣屬題羅兩峯上元夜飲圖摹本

廠市歸來醉管絃六街是處是新年不須遠溯乾嘉盛
說著同光已惘然

紫姑賽熟却趨朝晚託交期破寂寥但願年年燈月裏
論詩說畫度元宵

二月二日溫毅夫御史招同訪舊慈仁寺

街西三寺無一存慈仁獨以松留痕雙松成三久代嬗

望古銷盡漁洋魂山光滿鏡昔登閣戒公息宴遺孤墩

此盧閣久廢同治初祁文端養病寺中戒公和尚築閣寺後最高處以鏡攝西山影文端爲書額 顧閣

龕火接涼翠中有梵籟無塵喧詎知轉眼便泡影窰像

指畫同泥洹

寺舊有窰變觀音及傅雯指畫佛像巨幅

三松倔強天所赦物

外不動甯非尊人間何世獨也正後秀足可追金元

金時

雙松國初猶存今三松皆補種亦二百餘年矣

欲知未來視過去詩成圖就吾

何言

花朝集花之寺

花朝無一花却造花之寺佛扁僧亦去荒寂可吾意喜

無城郭遮西山青到地天然有水竹野步隨所至此來
或是夢往迹忍追記暝近雪且成陰寒趣歸轡

蘇盦招集江亭時瘦唐將假歸

勝地如勝朋習處不知寶一從別後憶反覆無不好城
隅一撮土見我少還老君亦江海徒及來共春討西山
爲留雪對客起畫稿冷冷荻芽風吹凍盡變潦座有思
歸人廬瀑已挂抱何妨少濡滯聊緩百憂擣他年或見
懷此會忍草草還尋舊酒壚曛黑須醉倒

葦灣禊集

葦灣昔再至先雨後遇晴重尋亦雨中含淚花盈盈今
來荷未出雪盡葭始萌朋歡旣一新物態還迭更獨喜

八十翁猶能守軒楹舊游數朝士約略記姓名却怪非
花時命儔顧出城山春不可卽況更新隄橫低徊壁上
題迤邐水次行喧寂各取適甯復知衰榮將詩當禊序
俯仰誰無情

法源寺丁香盛開酬趙堯生

無花常獨來況此丁香海隨風扇馨烈紫白各璀璨海
棠開已闌牡丹未破蕾靜女淡益姝了無一塵浼追歡
幸猶及栝柏亦好在行宮剩枯槐誰當禁樵採

曾剛甫招飲崇效寺花前

春光能醉人花氣醺於酒君詩夙饜我香味比花厚棗
花取名寺近乃富鹿韭紫白冠以黃墨者聞最後紅杏

青松圖聞將還僧手但要選花易韻事已僅有

圖在楊蔭伯處

欲歸諸寺

庭楸亦自花鎮與佛相守丁香西來閣枯株顧老

壽舉觴酌朱王詩魂常來否

送胡瘦唐歸江西

涉春行不留胡子未爲忉矧茲岵岵望久矣昏晨缺亭
林傷陸沈益懼人紀絕嗟君一東管漚盡方寸血東風
日夜吹新綠柳成列廬阜吾能忘西山子忍訣載書壽
二老世事不可說或者念我曹謝祠花底別

題蘇龕海藏樓圖卷

莊生狀陸沈離世類枯槁行藏絕意必聖者故中道曩
子宿吾樓山雲白浩浩廿年海三變長望出日杲深根

甯小行樓成子亦老顧懷將壓懼蓄念幹洪造東來更
袖手歸去趁芳草曰艾未遽衰一室安事掃交興與交
喪爭此千金保頽暮吾合休吾樓且自寶

畏廬招泛通河

釣徒落塵網見水如放歸閩江劃雙流君我各一涯煙
波老忍割來與風埃期通河源玉泉放牖清淪漪秋泛
昔有圖況及初夏時葭莢雨新沐船過鳧羣飛依稀家
江景所欠青山圍乞君爲我圖逝將尋舊磯鷗鷺正責
諾素衣幸未緇

靈光寺憶竹坡示畏廬石遺

巖扃猶剩題名墨池水應憐皺面人約略老坡眠石處

却從榛莽告晁秦

同穎生龍泉庵坐月

西湖西山迭賓主五載還同月中語蕭森松際無留雲
多感龍天爲收雨昔君城居閱兵火誰識山刹竝焦土
佛摧塔壞過者悲況我三宿迷處所茲庵幸完足坐卧
不獨松壽柏亦古去秋與客一再至準擬長夏借逃暑
君持茗芽龍井來共就龍口掬泉煮夜深細響合松籟
淨洗根塵見肺腑石梁看瀑君未饜我老枕流宜石鼓
世間何地無月明到處松泉視人取

閱游學

廷試卷宿

文華殿西廂懷鄧鐵香鴻臚同

治甲戌

殿試予爲收掌官鄧以御史監試

卅八年前掌卷人白頭來坐 殿中茵人交干祿書猶
昔科目翹材館一新大道誰傳無盡火羣公自積後來
薪騷魂合在梅花外悄對涼蟾憶撫塵

題伯愚將軍

志銳

同聽秋聲館圖並送之官伊犁

重入修門並禿翁舊巢如掃付西風從來秋士多蕭瑟
不爲霜林與候蟲

山北山南屬老臣冰霜百鍊不貲身胡牀夜夜聞笳角
萬里長安月自春

出撫山西憶張文襄行時三十年矣

忍將大隱換麤官籠鳥轅駒引去難一昔溪山除夢到
從今案牘當書看修途汲汲爭餘晷獨樹蕭蕭向江寒

尋轍太行愧前輩卅年讓我得潛盤

同石遺郁庭藜觀宰平游溝溝巖中途阻雨宿白鴿墩
歸來庵陶齋所營也

故山痼胸無可藥除借他山與磨錯西山游熟羨北山
難得休閒試行脚溝溝取義水注谷一谷中含百崖嶠
陵山西望已魂與縛屨租驢趣晨作四更雨師忽破夢
勝負山靈視此博韓蘇欺人禱輒應天故無心孰厚薄
能留三日會有晴無那吾儕苦塵縛雲峯隔崦晚奔湊
飽飯山庵恣談謔庵中主人今漢南此際相望定誰樂
瀛臺侍直七月至九月得十六首

夙聞堯顙類高辛選傅何期及舊臣忍淚殘宵還炳燭

子孫要作太平民

孔墨雙流本渭涇五章教孝始
宮庭不慚迂闊平生

學 二祖開基是此經

世祖命儒臣纂孝經
衍義 聖祖朝始成

書屋 純皇舊補桐 龍潛已裕
十全功神州渴望

中興主早晚 垂靈牖 聖聰

樓臺樹石水中央聯句何年踵
柏梁宿衛廬虛橋板在

忍從老監說 先皇

放船未悵失花時猶及荷雲覆
綠漪三十年前橋上過

虹腰 聖藻幾時窺

古柳空心都入畫老槐蠹葉鎮
垂絲無情似汝偏多幸

及見瀛臺 賜宴時

艮嶽何年輦入金排衙疊翠到而今九成元是隋仁壽
不比甘泉與上林

輦路三朝漸就荒那知海淀轉生桑經年春耦齋中膳

短夢無人記

毅皇

同治季年議復圓明園尋改修西苑穆宗上賓迺罷

亭榭迴波樹蔽天梵宮長屬玉堂仙誰憐八十先朝

傳圓殿東頭舊胄筵

萬善殿西廂爲南齋翰林直廬殿後迎祥館已庚間徐相以毅

廟舊傳傳大阿哥於此

突兀何來海宴樓思量社飯閱三秋幾回閣筆終留識

更望橋山涕不收

孝欽建樓以款女賓命張文達書額文達請改晏爲宴不聽戊申

十月大事均在西苑若先兆然

綺紈果餌拜

恩頻

賜饌

東朝比輔臣簪笠半生

饗鰕菜何時容乞自由身

此腹朝朝飽 御厨極知君等笑 愚儒平章軍國同 俄

頃退食金鰲一事無

亭午下直閣
臣已先退

鶴聲不到南臺樹 六歲君王試擘窠 但願平安能永

保老臣受

賜已多多

上親書吉語分
臣寶琛得永保平安

賜同直
四大字

霜華漸欲作冰堅 放牖冷冷瀉玉泉 腐藻敗荷收拾盡

空明還我水中天

危綠當窗半變黃 樹猶如此悟天藏 涉春霜柏祖仍舊

看汝成陰又一場

同舟日日賦卬須

禁掖明朝各自趨

九月晦日
駕還宮

斗室

隨安轉成戀再來準補歲寒圖

上下直輒
憩隨安室

淨師別於鼓山二十餘年矣頃復相遇撫今感舊賦呈
橫街詩夢卅年痕又向王城話水村小草出山慚欲死
孤雲戀日黯無言人間龜筴從何問泉下韋弦定幾存
誰信相隨衾影地哀時長有獨醒魂

勞勑叟卜居涑水賦詩留別次韻奉和

夢夢此醉視穹蒼去雁衝寒別舊行忍見衣冠同一劫
得安耕釣卽吾鄉相知蘭臭甯傷晚未死葵心總向陽
終就巖泉分勺飲不須清濁問滄浪

得勑叟涑水書疊前韻爲答并柬小帆

停雲西望鬱蒼蒼書至猶緘淚數行此局未輸胡斂子
我心如醉莫知鄉劇憐握璽祇 文母癡想揮戈有魯

陽聞說耦耕鄰約遂山中殘臘且聊浪

述懷示子姪

嵇生魑魅恥爭光通介徐公不改常窗下羲皇能一卧
海濱鄒魯故吾鄉夢爭王室心甯死歸耐先塋骨亦香
未必明夷容演範淹留人海漫佯狂

餘生樂命復奚疑戀闕難酬最後知豈有雞羣堪鶴
立何曾狐腋勝羊皮殘棋收局猶爭劫深井觀瓶總近
危霜月滿庭對蒼檜相憐不及未寒時

鄭友其大舅挽詩

寒日無光雪不成南鴻忽至涕縱橫難憑禪力平不憤
猶及堯年了一生書種吾鄉憂遂絕淚河他日向誰傾

鼇峯合眼何曾燼長覺微言總帶醒

賞穿帶膝貂鞋感賦

晚被殊恩但益悲章身何慕見尊師豹斑窺管難言
學鵷翼濡梁每諷詩撫事侍中慚勁悍懷憂退食敢委
蛇臣家世寶立狐賚成廟當年正盛時

十二月二十八日同瑞臣樓樵訪小帆韜叟於涑水再
疊蒼字韻

山向畿西自鬱蒼看人襟淚一行行相從曠野傷吾道
差喜幽居近帝鄉霧淞障天消夜雪風沙捲地失春

陽杜鵑臣甫容勤拜東眺猶應勝樂浪

謂韓王

瑞臣見示守歲感賦用遺山甲午午除夕韻次和

鐘簷無驚鼎遂遷故憂薪積火終然載花都入移春檻
失水俄成架壑船自斷我生元有命不知今夕是何年
王孫隆準狙宜慎莫學湘纍苦問天

滄趣樓詩集卷七

閩縣 陳寶琛

正月十二十三夜紀事

壬子

不是咸陽豈洛陽
九衢如沸切霄光
自焚正作佳兵鑑
善將甯無禁
覬方坊市周星供
一閤掖闈通夕備
非常擔囊揭篋臣
何畏睡足燈前自讀莊

次韻樓樵正月十三日因兵亂止行禮感賦

老病猶思拜杜鵑
矧陪經席筮蒙泉
鵠行不整虛趨

闕 龍德曾飛異見田
空市夜來煩聖慮
深居天

合佑遐年生逢堯舜人
方幸二典甯勞野史編

次韻瑞臣春望

老更傷春滯 帝城海天南際是柴荆百花無主誰司
命一雨何慳急洗兵官道馬驕新綠滿 禁林鴉散暮
煙橫家家上冢知寒食早晚 山陵儻顧成

答小帆用蒼字韻見寄

與君衰颯鬢都蒼望古平生愧景行祇道王城堪大隱
那知春色是他鄉世風無地容章甫史例微聞病紫陽
風鶴不驚塵不到且從田父醉淋浪

題何潤夫養園圖用卷中祁文端舊韻

園林安可常適然成主賓坐君綠陰中疑與澗壑鄰秋
花斷人腸忍死經冬春僧房歛觀止乃爲隔世人諗君
亦避兵徙宅城南新顧念亭子上槐龍誰與馴軒櫺與

墻藩位置盡手親故知皆幻緣有圖存一塵邂逅吾且
戀矧君永昏晨觀頤重所養大患正有身祁詩審晚年
味之如飲醇咸同貞元際緬想餘悲辛歛圖將歸君展
讀還頻頻

次韻和匏庵 實錄館同人攝影偶志之作

孤臣無分再瞻天晚直瀛臺輒泣然復土何年稽一
哭細書終老息諸緣看看興慶班餘幾歷歷開元事
滿前他日夢華各成錄能忘此會玉堂仙

三月廿四日再訪小帆勒叟涑水村居

昨來臘盡頃春殘棋局長安總未安場圖規成亭亦結
遠山如畫就君看

兩村還往一牛鳴炊黍羹蔬數短更此景從來誰夢到
菊花開後尙論兵

同是人間待盡身菰蘆心事媿遺民朝朝掉鞅金鼇路
猶自冠裾託侍臣

天中節 賜紗卷次溫毅夫御史韻

五日唐宮例賜衣人間節物奈全非夙忘寵辱空諸有
老閱寒炎審所依耕釣分難初服遂章縫幸未素心違
聽鐘猶共趨 長樂但覺晨星取次稀

得幼雲青島書却寄

足恨饒悲更送君瞻烏誰屋況斯文三綱漢後看眞絕
六籍秦餘恐卒焚累疏不迴垂盡日一樓且卧未歸雲

墜驢開口何年事差幸 經帷遠世紛

次韻畏廬石遺唱酬之作

畫師退筆已成邱詩老清霜亦上頭亂後田廬完自好
客中歲月去何遒發揮靈秀從人買商略叢殘爲我留
自笑情緣猶未斷溪山到處有吾樓

黃忠端東坡後游赤壁圖爲黎露苑編修

湛枝題

忠端吾鄉賢書畫並奇恣風藏硯山圖獨立正氣梁

髯炫我松磊砢千里致

節庵有公畫松曩會滬上馳取諸武昌以示

別來歲

云寒再見定何地君今得此本用筆特工緻何愛寫後
游賦語殆有契江山不復識石硯眼出淚閱年近三百
望古更題識夢中鶴不歸去去人間世

力軒舉醫隱廬

力子治小學而以通於醫五十守田里不與金門期偶
爲人海游想望中興期儒術世弗尙顧被方技知維時
急變法 二聖方宵衣宗袞非聞平碩輔無韓琦大患
諱自養責效劑和微傳宣無虛晨賞賚使還馳郭玉之
所怖越人固見幾有廬城西南爽塏於病宜花竹與果
蓏適情兼藥饑我來已改元相見餘齋咨正有棟橈懼
豈徒 弓劍悲省君插架書猶是俸入遺窺源證誦籀
訂贗窮軒岐此理東西同新故何常師醫國匪吾事活
人聊自怡每從談姬巖安能忘陽崎 君籍永福徙居
侯官之陽崎 一
壺處處可所冀太平時

題可莊楷書冊子

連房共硯十三春慣見官奴寫洛神再過舊廬餘落日
坐憐東海幾揚塵雕蟲何損擎天手乘鶴難留閱世身
長有青箱珍片羽忠廉三葉未爲貧

哭司直

病深始悟世無醫傷性殘生悔已遲廿載未乾當室淚
一貧難塞倚閭悲庾塵不污歸無忝陶幕相依死有知
槁木成灰猶汝慟遙憐癡叔鬢如絲

鷺房觀穫示軒舉

慰情涉林垆乘霽得觀穫人煙廣莫野十數卽墟落黃
雲錯蒲葦彌望際叢薄沮洳自古然猶防恃力作物窮

例返本敦俗孰農若耘耔以俟天操蹄願已約營田有
遺蹟稍稍事芟斫猶似陶江佃羨君好腰腳平生習疇
壠老顧無住著休日亦自難相從一宿樂

展重陽同石遺嘿園宿師子窩因過祕魔厓

秋深赴霜林常恐風先我誰知前夕雪斷送陸渾火渥
丹變焦墨入畫亦自可狂飈通夜號千樹曉不墮成毀
時則然造物測或叵君看初日麗條爾黑雲裏却趁半
晌晴祕魔厓下坐

華卿協揆僑居天津感念去歲賞秋海棠用同館天字
韻見寄依和

斷腸花盡又霜天心似寒灰不復然金馬尙容充小隱

月泉何意結今緣
史宓筆削關傳信
社飯思量忍溯前
欲藉門生詢足疾
籃輿準抵地行仙

九月二十九夜大風不寐作

狂風如雷不肯停
中有無數寒號聲
又疑控弦萬騎下
欲曙不曙甘長醒
去年今日泛舟處
立冬未屆昨已冰
大鈞失柄五紀舛
不怪四氣相侵陵
何辜道旁凍死骨
誰實階厲天無刑
神州累碁更幅裂
熙熙賀厦甯異情
餘生皈佛戀桑下
敢望身及黃河清
團城松栝日相見
輸汝厯厯金元明

得仲勉書寄答其意

萬里生還已歲除
剗肝猶擬獻

辰居坐看沉陸吾真

媿癡想回天汝亦疎相見幸留垂禿髮得歸共理舊舊藏
書舉家總食先臣澤薄薄田園是俸餘

步溪以長至雪夜來都有詩次和

相思千里雪中來今日人間始可哀垂老未平君壘塊
有詩能使我低徊故鄉近臘山應好世事如雲斗又回
會面且難歸豈易花時儻及醉豐臺

贈幾道

終賈才氣鄒枚文海西始歸先識君苦將痛哭聒里耳
聞闔蕩蕩誰能聞至今追話輒自哂嫠緯依然周已隕
萬言及上 皇帝書老尙賣文寄悲閔江樓翦燈梨與
檀望衡還往一釣塍廿年驥子亦千里相對能勿雙鬢

華世風貴少例侮老漫擁爐雪聽宮鴉著書五車竟何
有堯桀是非付杯酒自循漢臘數躔離且閏唐年介者
耆故鄉橘熟紅滿林霜中猶是平生心君如作亭顏楚
頌會約沈愛蘇鄭龕歸聯吟

次韻和步溪

今愁古憂身併擔情絲纏縛成老蠶蹉然聞音慰衰暮
失喜對雪同城南別來侏僂已逾艾元髮雖禿驕霜毳
我當晨興子不睡夢寤震壁方雄談昨游郊壇閱書肆
夙嗜未饜謨觴探賈胡捆載此殘賸文物散佚繫誰慚
西山向人不改色松栝冬秀龍蟄潭往時避熱每信宿
九九今正寒及三君能度臘值休假賈勇前導吾猶堪

夜中顧共阿戎語文種垂絕常悲含卅年兄弟子猶子
染素肯使迷朱藍人生得喪視所寶萬一用世功勿貪
疊擔韻答畏廬

百年形役勞般擔豐此嗇彼猶原蠶自非培風有厚力
北徙安可兼圖南與君生長山水窟霜髮乃共塵中麤
奕棋轉燭送身世剩作遺事開天談君師與我故莊惠
石厂留墨同捫探

去秋同觀祕魔
厓偶齋題壁

年來邱壑亦遂廢辱

爲點筆滋吾慚故山入夢怪慘澹矧更聞雁哀江潭君
雄於文老益壯萬言但見唾地三丹青餘事且自課坐
待取醉朝朝堪昨詩惠我一再至卜宅顧儼從羅含無
涯世患漫蒿目去住展轉春波藍讀書博塞等傷性多

文雖富君勿貪

次韻答畏廬人日見寄

癸丑

嗟君傷亂思鄉土老我銜哀直
禁林入世倦禽終愛羽逢春枯樹自空心
溪山無恙猶堪畫甲子長存不廢吟
倘及餘年見清晏相從一醉荔支陰

太行隆裕皇太后哀辭

長春寒月黯無輝頓使
沖皇痛靡依
帟殿衣冠猶

似舊
陵山輶輅及同歸室誰實毀孤安託醫固無良

死早祈遲暮偏蒙
恩禮絕側身墻髮重獻歛

節庵自梁格莊以
崇陵祭餘羊果見餉感賦

輦金治陵三涉春樓臺朱邸爭嶙峋
寶城未半玉步改

殞宮涕淚來孤臣當年貶官坐少慙晚被 召對還

批鱗擊奸不中挂冠逝留得板蕩酬 恩身瓦鐙雪屋

凍徹骨白況廬墓山中人朝晡上食從拜下哀動陵戶

喧州民餒餘籩實遠見餉感念疇昔滋悲辛 先皇初

政媿元祐卅載誰造淪胥因受遺一老卒祈死

張文襄於宣統

元年嘔血病卒

可惜此座天無親近聞雄文誅沙麓譽以堯舜

卑宣仁一抔合窆縱稍殺要勝醵葬思陵貧春冰既解

趣將作誠感忍恡司農縉山泉生瘳詎可久準擬復土

及霜晨世人莫漫嘲顧怪此義一髮今千鈞

文文肅

震孟

致劉練江職方

永澄

手札十通爲露苑題

文肅釋褐初明祚已衰晚講筵屢納誨入閣未席煖一

瞑桑海前卷懷不復展所契劉職方早天黨禍免平生
切劘雅累札見懇款斷斷辨清介意故鄙熟輒任事先
知人朝局適與反可知志節士窮達言必踐束帙還黎
侯追味猶潛泣

梁卓如招集萬生園修禊未赴有詩徵和分韻得此字
鬢絲不照城西水病裏傷春又上巳園林無恙風景殊
觴咏大難主賓美絕域生還君未老春明餘夢人能紀
却追永和事祓禊似替義熙存甲子舊游牢落過酒壚
白日滄涼見宮雉就令沈飲詎荒宴正藉哀絲作變徵
招呼彥會阻寸步反復雄篇歎觀止右軍故是溫謝流
臨河奄有嵇阮旨貽書誰解奉龜鑑弄筆世顧珍蘭紙

游越林詩集卷十
戔生明月閱人多相感曠代得子始儘收碎金都一集

更喜靈鐘應千里

滬上樊園亦有集

僥倖風雅未卒淪後六十

年儻三此

題朝叟滄麓歸耕圖

休日頻來話夢餘不成野穫且郊居耕夫識字勞殊甚
兼授村童四子書

甘澍旬來徧近畿誰知 中禁屢誠祈 潛龍民物何
曾釋說與遺黎恐涕歔

舊坊自壞橫流成夸父虞淵抵死爭今日回思真失笑
齟齬頭白兩迂生

觀王文成書游廬山開先寺聞瑞卿都諫亦往白鹿因

簡詩題後

紀功石側低徊久誰見聽鐘獨往時翰墨於公本餘事
風波當日正孤危嘯聲隔嶺如相應心學逢源了不疑
曾是兩賢枝策地殘生鹿洞可重窺

題文衡山自書西苑詩十首

懷舊金風采此篇流傳已是百年前詞臣多壽還多幸
身及承平侍講筵

黃忠端畫報國寺前後庭四松應天郊壇左右各一樟
浦楊搏九孝廉攜以入都屬題

先生常爲松寫真龍性不在髯與鱗此卷疎疎類稿本
要師造化非畫人後生私淑苦力薄過眼摹倣瞠絕塵

慈仁習聞但雙樹誰識偃蓋前交陳應天郊壇更奇絕

忍與凡木同蒸薪六松託畫並千古礫砢蛻盡存其神

垂三百載世始見不然淪寂瘴海濱時流弗貴子勿炫

識寶豪奪防東鄰

日本人常重價購公眞跡

石遺寄示雨中小雄山觀瀑游記并詩率和二絕

縣流難得雨中看儘奪谿門作怒湍此景在山常夢見

却輸歸客獨凭闌

詩來風雨繞心魂知是泉喧是竹喧不及山人王友石

一邱送老便成村

隔嶺官烈村王用文所居近村有噴淙巖瀑布與此髣髴

寄和石遺登海天閣詩

愛山每結廬雨奧此一曠檐摩絕頂雲欄俯隔江嶂來

薰帶野綠上月挾溟漲松濤下方作巖壁左右障涼燠
俱有宜昏旦各殊狀永懷獨寤宿失笑總幻妄君詩猥
見及吾閣幸無恙遙知倚杵憂儘入凭闌望石泉細自
滴甌茗冽可餉不似澗瀑喧試枕百尺上

閣左右鑿出
泉淪茶甚甘

十一月十八日同愛蒼看雪江亭作

君昔觴我江亭春葦海漲綠風日新一寒千里今集此
避面西山如畏人是何世界費裝飾水帝屑玉龍輦銀
麥田尺澤慰情耳苦矣無褐周餘民故知重陰例凜厲
幸畢虞祔宵達晨蒼梧之哀天所弔波及同軌攀號臣
皚皚萬頃洗淚睫風起不挂城坊塵壚頭一醉行復別
冥鴻泥迹何新陳

次韻徐梧生

眼看宮樹雪紛披猶抱冬心拱赤墀避世已成終老計
識君偏失盛年時君民堯舜誰曾見治亂開天頗有知
賜沐亦思共幽討西山何日轉春姿

月華貝勒招賞庭梅

甲寅

閱徧冰霜占斷春鳳城從未有雙身不須勤舉飛英白
滿院幽香已醉人

親手澆培二十年對花猶及未華顛天心地氣須猜度
人事終持造化權

廿年零落幾朱門歷劫臙仙合斷魂自是深根移不得
國花堂下了無痕

耐寒總抱向陽心步障圍春不在深懺盡綺情就灰槁
却陪索笑一沉吟

三月十二日同贊虞頌垣朗溪游石經山雲居寺次日
有上方之游而余先歸

清明已過冷無那野桃始華杏未破慙題故以草得名
吹綠東風儘飄簸禪宮因山切雲上梵響出林與泉和
鐵局石窟經全藏薪火縣連僧一个壁中尙書井底史
願力吾儒孰與大法華椎搨千歲餘下瞰人間如鳥過
亦知隔嶺勝尤最一宿先歸迫晨課詰朝西望峯層層
君等上方正雲卧

登岱同伊仲平徐梧生榕生兄弟

十齡賦望嶽絕頂老始凌艱難得休暇矧挈同心朋山
雲不成雨爲我祛炎蒸循麓睎天門疑無階可升千盤
萬級上更有最上層所厯柏松盡巖巖但石棱登封跡
猶是人世自谷陵若爲叩真宰八表來填膺

勞山經宿處我來後兼旬

玉初前月宿此室

候日喜遇霽題壁

猶軒新却讀堦齋詩

壁有藪夫一絕

等爲聽雨人雨止俯雲海

連山白向晨漸如積雪消羣露礬頭皴欹作泉百道巖
谷紛垂紳此景世幾見萬事有屈伸

嶽德在雄厚後山隋且幽得泉石華活觸石松枝繆冠
巖結精廬盤磴承岑樓上有萬古峽滂然不斷流雲液
可療飢嵐光能養眸亭午不知暑伏中疑已秋東轉益

勝絕留之期後游

下山如覆棋要著輒諦玩雙崖孕雲松松態百千換對
松有危構山綠儘占斷惜惜御帳坪懸水受眾灌崩巖
當水衝搏躍益猛悍石亭劣容坐難得雨後看五松尙
存三襲封可一粲

南下隨澗流路迴澗忽避稍東蹴亂石活活淺可揭陟
岡見廣坪明滅石經字龍泉出其巔下與澗水會洗成
一片雪渟瀟有餘地臨流聽未饜閒道躡我至小庵便
食宿折補昨失睡夢魂在何峯是處響湍瀨

登高恃筍將磴闊得平進龍潭近西麓踰嶺顧險峻玉
龍破山飛聲挾雷雨迅潛淵黝無底下注亦萬仞人言

似棲賢北來見已僅五年塵土積藉此洗煩客吾齋三
疊泉天末何由訊

不見明湖近六十年過濟南同張振卿前輩雨泛飲于

湖榭

岱雲隨車度清濟一雨濯遍明湖荷影頤湖舫始何歲
樓觀突兀周四阿小滄浪館最眼熟牛角逃學頻頻過

湖心古亭舊駐蹕詩刻長與光林蘿先臣壁記亦好

在五十五載來塵沙

先大父咸豐己未重修歷下亭碑記爲何道州所書

中間

世事凡幾變豈但容鬢悲觀河張翁執手訊宮掖三

歲夢斷風中珂蒲魚芳鮮足一醉不飲如此風光何酒

闌月墜忍便去坐對照檻鱗鱗波

過青島晤劉幼雲屬題潛樓讀書圖時歐洲構兵島亦
戒嚴

三年一面九迴腸樓外滄塵恐又揚四海曾無牀可坐
羣書容有壁能藏元黃龍戰今方始瀟晦雞鳴古所臧
大好家居猶自壞枝棲萍寄事尋常

九月七日游玉泉山登妙高塔

偷閒豫了登高債思舊來尋酌水盟垂暮猶凌孤塔迴
無塵能浣此泉清離宮樹石餘王氣絕島風濤有戰聲
地下故人應見念憂危當日自承平

姚叔節解元屬題張亨甫先生題寄按察公石田畫卷
過庭耳熟姚張交詩稿受寄更三朝象賢抱持兵火際

卒就微祿爲寫雕棗梨捆載千里致歸告家祭辭折腰
我尋棠茷後一紀洄溯風義江天遙晚丁潁洞再覲子
尙手此卷珍松寥當時題贈事偶爾世患騰沓來如潮
溪山勝畫孰竟隱何地乾淨如僧寮窮通修短等一覷
萬劫要恃平生要百年可作大父行故家文物猶稟姚
亨甫先生病中自定思伯子堂集按察公在刊行未果
慕庭丈宰安福時卒成之寶琛使贛先君命購求則
丈人告歸版還張氏矣卷末七古曾於集中見之

題鄧鐵香鴻臚遺墨

鐵畫霜棱肅我襟人天何限別時心一從諫疏明朝斷
馴見神州大陸沈往日回思真可惜眾芳萎絕更誰任
卅年留得荒濱叟來對西山說鄧林

四月十四日同嘿園宰平游上方山至兜率寺 乙卯

畿南之山最大房石廩層沓摩穹蒼銀陀峻極古弗貴
偉此巖壑稱上方峯迴澗束合林翠森壁留罅穿天光
折盤開闔路幾絕數武一換山陰陽豈無飛流與爭道
上有欄楯臨沈洋石梯厯級三百盡複磴稍坦雲屏張
庵堂七二半頽隤錯落丹碧仍相望入門古柏儼初祖
建寺或者真隋唐洞游巖坐絜先後爭取餘晷腰腳強
經行犖确亦勞止差喜所得堪汝償

覽一斗泉憇華嚴洞歸過十方院白牡丹正盛開

寺後微徑循澗阿石厂出林如補陀嵌空鍾乳作諸相
巖頂倒挂交松蘿斗泉淙淙逗巖腹傳會龍尾無乃訛

華嚴安禪有常處南下一洞簷嵯峨對樓山綠泛茗椀
坐久恐放桑榆過道逢異香出僧院天女捧玉疑相魔
空山春歸賸自賞奈此半霎銷魂何

晨循摘星陀游雲水洞

摘星陀峻無由登折旋斜上層復層雙崖前橫忽中豁
杖底百里河如繩綠陰障天導西下磴盡始見巖栖僧
乍探洞口怯深黝作氣聯臂賢吾朋俯僂匍匐僅得度
手據足抵吾猶能稍前一罅側身過以火照壁龍對騰
穹窿仰視不見頂列炬十數終凌兢雪山危墜塔斷卧
鬼佛尋丈疑有憑咄哉扣石備眾響笑語輒作洪聲磨
燎光瑟縮益險滑欲進却返心瞢瞢重幽頓出眩隙景

失訝接引來然燈歸途追憶恍一夢長覺繞耳鐘
吟噲自上方歸東贊虞

老尙攜朋到上方後公已是一年強雲梯猿引猶能上
陰洞蛇行幸免創有興再來還我共茲游所欠要天償
奇巖夾澗無飛瀑好樹彌山未著霜

六月初一日漱芳齋聽戲

鈞天夢不到谿山宴罷瑤池海亦乾誰分梨園煙散後
白頭及見跳靈官

一曲何戡觸舊悲卅年看舉壽人厄相公亦是三朝老
甯見椒風受冊時

壬申大婚禮成
元和癸酉始來京

凝碧池邊幾淚吞一般社飯味遺言史家休薄伶官傳

猶感纏頭說報恩

此曲能聞定幾回
分明天樂梵王臺
昇平法部乾隆日
婁縣尙書舊費才

沈隱禪畫梅冊盛季瑩所藏節庵每葉有贊

畫塵論奇畫更奇
不似而似世尠窺
槎枒肝肺偶一吐
華光歛衽況補之
畫家上乘師造化
造化之始將誰師
縱橫屈伸無不可
如佛變現窮言思
盛子寶藏取自怡
梁髯讚歎猶費辭
冰心雪魄三百載
欲下轉語還然疑

秋深寄內

出水荷錢看到花
又成敗葉上輕槎
坐驚大陸深秋氣
偏貸餘生閱物華
皈佛祇贏心地淨
憂天能免鬢霜加

相知猶有同心侶不怨離人不憶家

吳柳堂御史圍爐話別圖爲仲昭題

侍御席藁爭失刑一斤歸卧蘭山陁當年廷議孰主者

斫伐直木新發礪

柳公聞刑部議成祿罪以立決監候雙請疏爭甚力下御前大臣會廷臣

議內閣已具草醇邸至袖出一稿請以私意揣測刺聽朝政懲言者于通政凌辰王理少家璧爭之不得遂降調而成祿卒減死甯期再出殉龍馭秦良衛史公所型同時

四諫接踵起欲挽清渭澄濁涇

時稱張寶何黃文襄尙未在講職也 嘒嘒

牖戶及未雨綱紀之正先朝廷角弓刷反局一變竄謫

流放隨春星

甲申樞府變易蕢齋以閭牆禦侮諷醇邸請留恭邸總譯署逢怒出外以至譴謫自

是言路貶斥無復餘矣

忌醫甘稔藥籠盡疾亟永命尊豨苓抱薪

止沸國卒斬騷魂九死誰能瞑我交待御恨已晚衰涕

猶爲同宗零

先生以丁丑來京戊寅圭庵謁假將歸病歿先生挽以聯云是國家有用人君不長

年我偏壽爲親朋輒作惡別猶難遣死何堪詩孫跋誤也談詩說鬼再寒暑度語會

踏田盤青

先生喜與予輩爲扶箕之戲有稱淨名道人者吳舍人泰來也唱酬甚夥先生常言欲游

盤山上陵一月有山僧來訪且留約

張侯居廬更歎逝攤卷百感鰥鰥醒

是夏黃齋丁內艱未逾月復喪偶朱淑人有春秋宮詞數十首纂歷代后妃表未成書卷中詩箋卽其筆也

薊祠旣成次故宅去後還往餘風螢

黃齋旣諷薊人士爲先生建祠馬伸

橋復以南橫街宅爲祠

橫街每過輒掩袂矧對遺墨憑精靈黃童

再死孝骨早朽肯念桑海吾伶仃藏書掠遍獨此脫呵

護無亦關冥冥

黃齋所藏善本書辛亥損失殆盡

長言追記慰明發永

寶手澤揚餘馨

二月八日節庵寄餉

崇陵橋下雪泉

丙辰

地宮三歲夢魂邊
陵樹成陰定幾年
此水涓涓終不息
和冰還注峽中天

雪中急遞一軍持
永念山廬尺涕時
自爇寒爐煎茗
茗不眠滋味有君知

謝節庵惠寄玉菌

陵山雨過菌迸生
故人茹薇配作羹
飛車遠將及退食
香奪檀炷光玉瑩
半生槃澗饜此味
老顧拜惠如嘗新
我如禪誦子守塔
每飯無著思
天親烹魚漑釜付
愴歎齋素自養心
源清手栽松檜正
愁檣破曉膏沐都
向榮髯乎一飽對
嫩旭野芹信美何
由陳

次韻答旭莊

大患吾儕正有身異於禽獸始爲人憂來老我難歸隱
書至知君又食新未死髮膚終自惜平生肺腑幾相親
亂棋滿局須看竟萬一殘年作幸民

題節庵葵花畫扇次韻

幽花生世不宜春佳色天然與菊親侍醺淡妝猶入畫
用韋莊黃葵詩傾陽本性詎隨人蒼梧淚濺斑筠盡金粟魂依
拱木新莫語荷杯池館日秋風太液足傷神

錢文端

陳羣

夜紡授讀圖

烏私何意達宸聰盛世堂廉骨肉同一德賡歌彰聖
善百年慈孝見流風累傳猶食詩書舊餘緒曾褒績畫
工輝映機聲燈影卷卷施福澤孰如公

穎生重葺環翠樓成寄題

乙巳

烏山一角青我春復我秋國改喬木在卜居無此幽曩
哲肯堂構望雲早歸休遺經逮諸孫露車當橫流緬懷
黃農世高契園綺儔三山雙塔間蟲鳥相唱酬五十忽
已至正有千歲憂木榻分坐穿生壙久自謀知命聖有
學易理如環周躡景負息壤吾甯忘吾樓

次韻樊山喜雪詩

鍊雲作花不作水花故非花蕊非蕊天宮欲放世光明
十萬修羅埽蓬塊都人盼雪最三九今年冬至值月尾
一陽井底回未回飛度龍沙條千里六街浩浩互昏晝
閉門僵卧者誰子笑我犯寒蹴鼃蜥蜴縮馬毛沒車軌

極知潛龍德勿用敢說老驥心未已比年輦轂苦旱澇
四海兵戈積瘡痍欲蘇重困賸歲稔所憂不在臣朔米
激江何救鮒轍枯見彈因思鶚炙美句來 中禁正齋

禱拂曙瞻 天顏有喜占豐消沴睭我民親灑丹毫詩
一紙時晴朔風益凜厲快賞王帖屢呵指窮簷鶉結更
若何始信經邦重燮理腐儒牀頭但周易夜駢斗柄知
天咫故山冬燠歸未得尺半雪魚長夢裏樊山詩老健
且豪貪看玉戲亦縻此陽春一曲和已稀莫再大聲驚
里耳

疊前韻和樊山臘八日見贈

凍雲作雪雪作水明日殘英昨初蕊晴窗煮茗對盆梅

安用濁醪澆壘塊酒壚回首逾卅春爨下枯桐剩焦尾
我修禪課皈淨土君愛清歌聽北里乾坤自古一劇場
此語聞諸木皮子紛紛高髻競新妝往往覆車蹈前軌
牽絲傀儡那自由百戲魚龍何時已時流愛惡無定在
未必毛羽勝瘡痍方朔偷取誰家桃麻姑擲盡無算米
昔年今日御王冠匪人美新新自美南郊鑄斗竟何用
空誤兒曹抱頸喜可憐孟德一世雄博得王莽傳數紙
若以如來法眼觀閨祚五年一彈指却遺毒痛徧宙合
散錢亂絲誰與理陸沈人海計未左眞率相從況尺咫
柯亭劉井不可說賦日李程猶在裏內廷臘八例頒
粥臣家漢臘亦視此九衢車騎賀歲朝積雪光中何耳

耳

再疊答匏庵並東珍午熙民

半生林卧癖山水歲晏聽泉嚼梅蕊閒鷗所得祇忘機
老馬何心更歷塊誰知造物惜溝斷偏遣送春及婪尾
葵藿枯死終向陽松菊雖存忍歸里曷讀集元詩百首
清淚如鉛心見子金鰲退食剩密記蕉園焚稿悲往軌
杜鵑老病猶再拜雞鳴風雨何能已亦知天運例貞元
可奈子黎苦瘡痂昨者夜吟庭堆鹽不管晨炊盎無米
同聲喁于張與周疊韻失义清且美西山積素正向霽
何不忍凍再隨喜記得盛秋連轡歸滿貯錦囊數番紙
試凌羣玉俯銀海天地晶然悟一指駕言是處可寫憂

濁醪中亦有妙理咏觴命嘯人兩三坊巷過從居尺咫
千里江魚到酒邊四壁唐花如畫裏帝京景物故好在
故鄉湖山恐無此與君相見霜滿顛世事從教風過耳

滄趣樓詩集卷七終

滄趣樓詩集卷八

閩縣 陳寶琛

梁節庵六十壽詩

戊午

伏波有名言窮老益堅壯交君垂卅載晚顧際板蕩平生盡信書自笑不知量祇贏方寸地未逐東去浪君乎雲龍從共此葵日向危冠眾所怪一蕢不辭障今年吟耳順令節正天貺吾皇題其堂賜資出內藏豈惟寵稽古多難識忠諒回思陵下廬風雪四番抗沾沾國士報自昔鄙豫讓生三義匪他長留作人樣

拜賜出禁闥萬荷香襲衣芳華傾路人心苦誰與知百昌遂所性豈不在及時惜惜海西庵坐送白日馳

沈起林詩集卷八
孰云致身早一斤看羣飛 聖顏幸再瞻風漢終爾疑
明樓聲徹天惜誦餘鬱伊心知霜霰至蘭艾等一萎露
根不改香大鈞庸有私故當儕寒松無爲傷枯葵

荔灣一尊話未壯君已髯服官却復辭山澤甘終淹相
思千里會淞波搖明蟾豈圖溫室中長歲如鰈鰾勸講
日不給遑暇憂蒼黔歸沐就庭楸借書互校籤元祐邈
隔世唏噓說 垂簾朝貴骨盡塵誰德誰怨嫌時於酒
壚侶襟淚還一沾河清倘可俟火井甯竟燼醉卧北窗
下風來忘涼炎

題研枕丈所藏石齋逸詩墨蹟

此身已許高皇帝刀鏤誰能攪寸丹正氣文山同所養

奇情鴻寶覺尤難孝經以外留心畫榕頌相持較歲寒
鄰有瓊珍知不早白頭退食恣傳觀

題唐搨武梁祠畫像殘本

燼餘紙墨尙香妍瞑想翁何跋識年五季如棋誰此壽
却容老眼看雲煙

贈日本內藤虎

乾嘉世遠風流盡隔海欣來物茂卿四部縱觀登秘閣
三桑親見過神京他山有日資攻錯大地何年話太平
歸路重煩訊羅隱

叔蘊拂龜無限卜居情

張魏公三省研馬通伯得之屬題

投閒假與養親年坐看秦頭自格天絕學寮中蟾淚盡

剗肝爲紙有誰憐

六月望後匏庵芝南珍午貽書幼點嘿園約爲戒壇潭
栢之游予先一日至三宿而歸

八年不到山間闊抵卅載眼明對松栢世換憐我在遼
金歲且千曾不柯葉改皎然受命正未死終磊磊嗟予
有涯生少留玩桑海每憂象教替斤斧誰庇乃託根遠
塵土得地復何悔明明去來今無用叩眞宰

北院裘以深積苔試孤步九龍拱揖客風過振韶護九龍

松實栢也

唐剎遼始壇僂指祇旦暮經幢與塔石可以證此

樹渾河日夜淘滾滾送沙數爪香搔帶漚衣綠坐含霧
難得半日閒無人自來去

吾漳子黃子常爲松寫真偉茲石墀側龍德妙屈伸隆

中不遇主偃仰誰能臣當年香山游盧溝失問津坐遺

鬱盤林不爲畫苑珍

忠端于西山
僅游碧雲寺

拂素貌神物愧非千

載人

偃松稱卧龍最
奇見輒寫之

邂逅松下風王孫皎如玉七年不入城飲澗飫山綠所

居樹石淨聽濤舊信宿

前游宿處恭忠王罷政時
所營王孫溥儒近居此

壁詩

媿鴟鴞惘款難卒讀郊迎恨不早誰實任沈陸心知大

賢後龍種詎偶俗豪吟慎出口輕薄易翻覆難兄久居

夷何日復邦族下弦月已高相對但謾謾

幽尋緣避炎遠涉正當暑僧房午炊具倚樹久延伫朋

來先就松靜籟入笑語連山繞東際登閣共一俯目力

隨所窮煙埃忍終古天雲倏變色飛電挾凍雨刹那亦
自休林月迭吞吐涼輝足忘眠矧此清淨土

潭柘亦宿游得伴更一詣輿轎曉踰嶺百轉始到寺銀
杏汝何修及見祖宗世翠華一再幸挺幹獻靈異

至今沿尊稱長有鬱蔥氣可哈野人語強指配統系看
竹仰宸題弄泉誦御製欲行却復迴愛樹重所憇

殿左銀杏高十數丈聖祖臨幸時傍生一株高宗
臨幸時復生二株皆數丈寺僧因稱帝王樹

詩孫畫馴鷗園雪中古栝

雪膚翠鬣越千春占斷江山閱盡人誰意息陰人去後
戰塵還恩歲寒身

詩酒淋漓八十翁當年亭榭共聽風吮豪意與騷魂接

勘取青青是雪中

贈陳漳州

嘉言

子輿論和聖展季特筆表微許其介坐懷誑鼎義凜然
此胸三公安足芥君官諫議類陽子出守乃得州民愛
至今霞漳燹燼餘猶禁剪伐重所憇而君瓠落南復北
老尙賣文抵酒債充然元氣足自養了無機心何論械
螟蛉蜾蠃任相思豺狼狐狸習不怪久冥凡楚誰存亡
遑與毅豹較外內我未識君讀程墨舉白遙爲吾友快
君領解葉恂子同年實典湘試廿年閩嶠始展覲愴話玉堂敘年輩愛
君詩美政逾美投轄郡齋飲我再回思竟是羲皇前周
道顧瞻祇歎懷君今七十差少我仍辦腰脚陟嵩岱藏

身人海最堪隱留命桑田儻可待西山寒退聊一登世
人莫誤伯夷隘

仲勉今臘亦七十矣寫樓前松寄之六十年前同讀書
其下也并題二絕

賜書樓下支離叟自昔吟風和夜窗頭白何年歸對讀
倚闌松頂看澄江

此紙儲藏近百年此松更是百年前乾隆 御筆親研
寫持較觀音像孰賢

雲岡山石窟寺 己未

戴石塞上山盡童皴雲特起森玲瓏誰開奇想鑿混沌
十窟鱗比祇洹宮夢游伊闕老未踐到此目豁先河功

佛高百尋小徑寸周阿市宇窮鑄礪眞君阮僧網偶漏
曇曜忍死存大雄法輪重轉發宏願石壽什伯泥與銅
乘輿數臨禱雨驗誰遣都洛捐雲中魏書酈注了可證
剝泐强半埋蒿蓬當時偉麗絕一世植福役徧中原工
要知陵谷有遷變自古不壞惟眞空 仁皇神武歲絕
幕 駐蹕瞻禮巖穹窿煌煌宸藻二百載西羈衛藏
北讐蒙層樓對佛萬籟息武州水挾如渾東

題陳仁先詩卷

束髮傾心簡學齋三傳晚顧見掄魁性情於古差相近
世界疑天特與開此後風雲還幾變等閒花木有餘哀
个臣遺恨君能說霜鬢當年苦費才

次韻遜敏齋主人落花四首

樓臺風日憶年時
茵溷相憐等此悲
著地可應愁踏損
尋春祇自怨來遲
繁華早懣三生業
衰謝難酬一顧知
豈獨漢宮傳燭感
滿城何限事如棋

冶蜂癡蝶太猖狂
不替靈修惜眾芳
本意陰晴容養豔
那知風雨趣收場
昨宵秉燭猶張樂
別院飛英已命觴
油幕綵旛竟何用
空枝斜日百迴腸

生滅元知色是空
可堪傾國付東風
喚醒綺夢憎啼鳥
罨入情絲奈網蟲
雨裏羅衾寒不耐
春闌金縷曲初終
返生香豈人間有
除奏通明問碧翁

流水前溪去不留
餘香駘蕩碧池頭
燕啣魚唼能相厚

泥污苔遮各有由，委蛻大難求。
淨土傷心最，近高樓底根枝葉從來重，長夏陰成且小休。

贈朱聘三

聖清制科數榜眼，中葉極盛稱孫洪。
卷施灝氣駕芳茂，一震嶽嶽詞林雄。
臨軒最後顧得子，先帝手擢開四聰。
宮袍連騎螭珠樹，驗取貞脆須冬窮。
天傾地坼亘八載，隘園何隘聞夷風。
陸沈避世不忍去，佳氣西望崇陵崇。
神功聖德萬千牘，涕淚鉛墨初迄終。
禮羅雜還謝要路，饑鳳不下誰能籠。
我同載筆久彌敬，坐對元鬢慚霜蓬。
同光追話恍夢寐，況溯文物思乾隆。
連珠合璧倘可信，豈有八表長夢夢科名。
不負雲五色，看子晚節如

韓公

張勇懃

樹屏

遺像

早歲論交託紀羣久欽難弟殉忠勛一門氣過方張寇
百戰功歸特起軍從此淮淝多出將當時曾李最知君
聞輦忍聽中興盛大好家居坐自焚

藜觀儼居蒙泉山館以泉水寄餉

庚申

髫齡食宿習琤琮老隔雲山夢萬重早潔心源何敢濁
徧嘗世味幾層濃書來爲喜居新卜瓶拆遙知手自封
終望及身見清晏從君啜茗最高峯

題劉雲樵封翁草書陶詩

廬山維嶽孰與高介立千載潯陽陶寄奴未篡賦歸去

寄興於菊兼濁醪食薇飲水抱茲獨義在桑海安所逃
杜陵詎會責子意正似愚叟期兒曹先生行藏頗髣髴
式穀顧欲儕伊咎寫經抗希贊五孝此集取譬靈均騷
滿樓海色昔造請親接杖屨看揮毫停雲同昏彌八表
何日洗甲名建蔡報韓一擊疏可惜終佐天授師六韜
刑天精衛志故在笑謝世士論枯膏會攜筆硯就五老
追話游迹大小勞

志道

英人莊
思敦君

留宿櫻桃溝卜築處

夢回疑雨復疑風身在飛流亂石中聽水故山吾最習
天涯老顧與君同

澗壑能爲盛夏寒未霜林葉已微丹潺潺洗出中秋月

擁褐深宵數起看

仰山寺

五峯環拱寶坊開
棲隱金元幾劫灰
龍井藥爐猶好在

朝山只爲妙高來

妙高爲五峯之一

妙高峯

闌干東際是京華
香火何緣屬碧霞
四十年前殘淚在

中官銜詔禱天花

十一月十九日同獲齋釣魚臺看雪

純皇民事重坊庸
頻對西山駐六龍
一代池臺忍蕪

廢百年樹木尙蔥蘢
出林亭敞涼宜夏
隨鐫泉生凍過

冬人海如君能有幾
忍寒來看雪中松

里中及門百三十二人讌集釣魚臺

辛酉

故山一別十三春猶有從游載酒人佳日池亭儼圖畫
昔年童冠盡纓紳縱觀寒木須時棟暫對清尊遠世塵
勝集金元遺迹在如斯風義定誰倫

爲劉氏妹畫松

樓前一樹恣盤桓長憶聽濤共倚闌不畏冰霜但愁颶
家書勤與報平安

次韻答周沈觀

恥同農圃較肥磽休暇林泉乞把茅槁壤及今猶望澤
危枝何處得安巢不材老我輸文本共濟須君愧苦匏
嘯傲名園春物足看山尙更過西郊

題傳沆叔藏元槧通鑑初印本

三世藏書自昔難使君述德與傳觀鉅編天祿煩鈔補

天祿琳瑯兩部均有鈔補善本鄱陽出覆刊桑海迭番誰此壽丹黃

窮歲似無官新收宋槧供讐比百衲何如璧最完

陶齋百衲

宋本通鑑亦爲君所得

勞勩叟鄉舉重逢拜 御書丹心黃髮之 賜寄賀

丹心黃髮契 宸衷褒德猶當式百工莫作尋常科第

看中興曾及見咸同

詒經精舍舊經生六十年前亦厭兵今日陸沈定誰過

可曾選舉勝科名

與君同舉不同科轉眼三年或止戈回憶金陵平定歲

中元甲子又如何

浙閩同于乙丑年鄉試
浙補辛酉閩補甲子

董季友屬題其母楊太夫人麻姑載酒畫幀

梁谿三楊盛文藻生晚吾及見女孫笄年隨宦老就養

詩畫清麗知淵源曩交仲子爰及季隔幔時獲聆清言

爲圖散花會微旨懺除結習皈祇洹

里居時嘗爲子
作天女散花圖

知桑海並親見此畫無亦元機存神仙狡獪奪造化平

陸胥溺能勿援塵揚水淺故眼熟儻起昏墊開衢尊人

天十載百感集賸對季子追夢痕畫中有詩況手澤仙

壇記在試一論

贈鏗臣族弟

造船習海戰肇基閩江濱文肅抱遠略經武先作人鶴

亭吾族秀於君爲從昆樞巧儕般倖勒名聞八垠志業
惜未竟趾美端在君投筆事戈樓橫海司機輪忠信屢
涉險護持如有神臨難見風義措危積勞勩卒慰父老
望歸坐船官茵五載百廢舉績茂時則屯無米強執爨
皤然感勞薪誰肯大董年日與傭役親世俗競掊克久
宦君能貧翁熱眾所趨君以介自珍擊楫夙有誓運甓
能辭勤聊此遠塵坱庶幾儕隱淪螺江與馬江潮汐同
一津親見締造始頗知陵夷因君如蒐獻徵盛衰吾能
陳不應左沈祠薪火終灰塵補巢貴先雨埃實在培根
勿謂一人陶無掾八表昏勉度陽九厄慎保千金身終
思見太平同醉堯衢尊持以質難弟

向辰 嗚噓將何云

志道樂淨山房落成賦贈

愛山避有名卜築揀塵表一邱孕水石世眼習不瞭畸
人海西至五嶽徧登眺茲太行陁專壑心願了初來
但張幕聽泉坐昏曉徐規居高明巖嶂左右繚屋成召
我落嵐翠泛杯醪俯視林薄中錯置數亭小下坡逕驀
澗迅疾比過鳥當水石倍瑩觸石水隨繞湍激度以鈞
窪盈牖爲沼枕漱隨所便樵牧戒勿擾去秋留宿處帳
廬月正皎彈指感涼炎棲心羨深渺披吟道書足還往
俗客少稍慊乏喬木尙煩補叢篠留題抵作記眞隱匪
外矯

七月十九日同珏生游厚齋將軍西園園在京西成子

山寶瑞臣恩詠春先至夜宿秀峯寺

追暑謀入山涉郊顧畏暍夢回快得雨簷滴曉不歇多
君挾雨具到門趣膏秣出郭雲旋流微陽出復沒龍潭
憇涼翠品水匪爲渴焉知水塔圍談笑已飈發主賓延
伫久宿諾幸不失周圍厯館宇羅列饜肴核不覺西日
晡敢嫌前路滑稅駕就雙峯聽濤玩松月

黃忠端畫所見古松爲長卷作記七章載集中楊搏九
孝廉嘗攜報國寺四松應天郊壇二松來京予題有
詩後九年又出天台東西九松屬題蓋先德所藏已
分爲二中更豪奪近始索回案諸原記尙缺包山以
下三章不知落誰手矣

壬戌

先生作畫如作書寫松如貌山澤臞胸蟠奇崛出簡質
游趼所至時追摹寸縑尺素世爭寶此本埋照淪鄉閭
誰歟忍心忒句奪真試并剪長江圖楊侯抱殘企先哲
曩眎其六今九株別裝一卷各專美遺孑宛見開元初
天台煙翠滿几席所惜中段猶闕如物無顯晦要得主
勇氣君賈銅山餘鏡完劍合會有日相見且盡花前壺
遺書煨燼任剗刷吾老校字甯辭劬

漳浦集板燬
君方謀重刊

病起賦謝克禮醫師君有聲滬上前歲歸與歐戰近來
京師始與余相識豈佛家所謂緣耶

醫學寰中久失傳西來聖手動回天感君深愛如親屬
起我沈疴亦宿緣一日幾回勞聽切餘生無恙恣餐眠

只慚衰朽留何用孤負靈方與駐年

梁格莊會葬圖爲余樾園題

北風吹易水滿路白衣冠無垢此片土不冰餘寸丹綱
常終古在風義近今難一訣欠臨穴頻揩淚眼看

梁文忠 崇陵種樹遺照

補天揮日手能閒冠帶扶鋤水石間不見成陰心不死
長留遺蛻傍 橋山

賀雪齋貝子三十 賜壽

祖 宗聖能並天縱游藝神妙開諸王覓庵玉池挺初

葉瓊

紫瑤
瓊華瑤晉
韻南

肩相望王孫趨庭授祖視晚出

顧欲兼眾長初師唐文逮王惲近更逸邁追倪黃寫情

巖壑取自適，不管人海塵。飛揚尺縑進，御愜宸賞。
灑翰旌以怡，清堂勅開祕笈。俾甲乙上泝元宋，遠及
唐人間畫史。幾夢見此福，方駕勵董張藝林聖手類壽
考君齒始壯，誰能量。殿門秋霽拜，賜出彩服歸捧。
循陔觴繼今，技道與年進。龍種胸次元殊，常老饒騁嗜。
蓄絹素歲歲乞費，隄麋香。

題林文直登岱圖

求死不得，乃出游登高望遠，翻百憂公之於山蓋亦寄
一覽焉。洗萬古愁，閩士恥名重介立一節老死甘炎州
中原瀕洞十載過新參，忽下徵魚頭。非時星鳳瞥一喜
招來麾去公休休，我晚還朝接寮列坐惜往日悲橫流。

陵遷谷變古恆有柱折維絕當誰尤逝將從公寥廓際
下視蚊蟲蠅蚋相春秋

四月十五日夜同穎生看月戒壇寺

癸亥

龍泉夢痕星一終山且塵上休問松

龍泉庵松摧數年矣辛亥同宿其下

戒壇數松足稽子並坐茲月凭卧龍去春山樓就君飲
丁香未花別匆匆北來卧病百念絕長賸贈什縈吾胸
何圖會合有今夕却話臣里憂兵烽餘生陶寫賴山水
安得佳處常子同清光分寸致可寶惜著雲翳圓靈蒙
晨游潭柘幸勿雨后皇一樹猶蔥蘢

高宗爲皇四子時致蔡文勤問疾詩翰敬題

家法尊師裕 聖功 十朝全盛數乾隆微臣毫及丁

陽九書屋曾窺舊補桐

懷舊猶褒八載勤
立言得力論韓文
當年仁廟昌朱學
薪火釐峯一席分

哀陳師曾

筆耕代祿養衰親
清白兒孫故耐貧
三絕能爲殊俗重
一暝誰謂彼蒼仁
戴星力疾輕千里
品畫來過欠五旬
我爲壽毫猶涕下
可堪老蘖對蕭晨

日本坂口五峯自其國電索予書走筆應之

半笏松煙伴歲寒
尙勞隔海數衰殘
釣臺歸試題饒筆
聊作平生縞紵看

題隨齋主人所臨禊帖二通

逸少千載人顧爲書名掩投身山水窟敘禊集百感中
原長陸沈宗袞但名噉書尺炳著蔡曠代見心膽佳日
試鼠鬚陶寫寄游覽孰知僧樓祕摹刻作世範賢王積
忠憤孤島萬緣淡篋中定武本望古頻灑染側理誰實
貽痛逝益中慘紙爲節庵所贈眼看不深淺一紀去奄奄觥觥
樂道堂家學故無忝

題鄧守瑕禮塔園圖萬松老人瓢塔在宣武門內稱爲
瓢塔胡同

遶金蒙古迭併吞天篤聖相蘇黎元從容一錄出入世
治心治國甯異源曩尋玉泉拜王墓岸谷冥想西劉村
巋然窳堵出屢肆咫尺憑軾通精魂仰山豎拂昔試手

布新滌舊降眾髡獻詩乘輿寓諷諭千里赴至師喪奔
佛耶儒耶二是一謂可將相非溢言三年北面得子印
評唱稽首西來恩曹溪滴水灑六合闕此舍利誰知尊
岷峨詩人志離垢心戀塔影規成園悲風一曲月正午
靜泊并絕鐘魚喧湛然集序卽顯訣蘸取油鹽味菜根
葉烈婦挽辭林生皋女也絕粒殉璫其姑亦殉節者
忠孝祇憑一念愚深閨荏弱竟捐軀少時禮教兒從父
輩起貞魂婦侍姑雙節凜然宜有傳二門清絕並爲儒
從容引決原難事多少鬚眉愧丈夫

聞公得黃勤敏爲祁文端畫秋花紈扇屬爲寫松

承平凡卉亦精神耆宿風流此一塵八十九年蟲網徧

流起樓言集卷八
衰殘及寫歲寒身

甲子元日立春書感

甲子

三元甲子歲朝春千歲猶難值此辰不合乾坤長板蕩
却留皮骨老風塵桃蟲世難操心苦芻狗科名拜 賜
新早達晚成都夢嚙曾無毫末答 君 親

次韻蘇盦夜直

春盛寒猶重風多晝易陰任天無早暮同物自飛沈地
氣鵲前覺巢痕燕共尋爐灰渾未冷相喻向晨心

劭予戊申乞假歸省厚齋將軍圖詠送別兩齋同人咸
有贈章公子倣彬屬題

先帝龍飛舉 恩榜臣門得士張與黃黃生 再 忠孝慟

早世君夙教胃

宮東廊淵源伊洛師道立餘事精鑑

評倪王方嚴平進不偶俗晚更異說憎蜩蟬挂冠不忍
見桑海朝露旋溘塵隨揚嗟予北來後半載却展此卷
心神傷當時感國抱孤憤猶戀禁闥頻迴腸滄流馳

波去不駐蘭芷變盡誰實芳卷中同直率鬼錄醉死吾

及臨曹

竹唐春

全歸末造總厚福勝對離黍呼天蒼郎

君篤舊歲具食影堂發篋羅縑細宣南殘夢一痕在葛

帔盡散陶樓藏

再同尊人子壽先生陶樓中收藏甚夥流失盡矣

明尋西園究

畫理龍種老矣終殊常

次韻濩齋病後入直作

固知無補忍言歸微願平生事事違好夢已隨芳草遠

舊人漸似曙星稀出門宿潦深盈尺舉目陰雲黯四圍
失喜涉旬見顏色病餘相視慰朝饑

和仁先詞龕海棠

乙丑

深房複幔護紅芳無那春風比虎狂照睡猶持通夜燭
乞陰虛熱徹天香畫師百感成絲鬢名友相憐儘斷腸
曾及盛年參彥會楔辰頻醉國花堂

秦子質來津奔問因同入都

麻鞋相見並霜顛回首閩山卅二年世以神州爲博局
天留我輩看桑田衰遲未盡平生意瑣尾翻羸一覲緣
何但黍離行道感下車城郭已瞭然

李子申畫芍藥杜鵑便面

曾是花王近侍花相從躑躅犯風沙故山紅遍無歸夢
來往豐臺輒駐車

過張忠武宅同愔仲猷園韻

義輪不趁魯戈回萬事人間總可哀未死宿心隨墓草
何年殘劫換池灰舊廬蕭瑟空流歎大陸瘡痍正費才
遼海茫茫華表鶴塵沙滿眼爲誰來

次韻蘇盦九日作

人間何世更商聲忍死終思見太平叢菊再開非故土
迷陽彌望奈吾行桑田海水相更迭蟬翼千鈞有重輕
一昨澄漪亭子上西山猶對晚松明

滄趣樓詩集卷八終

卷八終

